

BIZKAI'KO ZAINDARI

(90n. urtea)

Aurten Urrillaren 11'n beteten dira 90 urte, Bizkai'tarrak erantzuna artu ebela.

Nok eta nori emon jakon erantzuna?

Berez Andra Maria Zaindari izatea eskatzeko eskubidea, Bizkai'ko kristiñauen gauzea dirudi, baiña sasoi aretan erritar izatea ta kristiñau izatea bat eginda egozan.

Orain be olako zerbait agertzen da noizean bein, baiña gaur gauzak obeto bereizten dira: Erriagintariak erritar guztien ordezkari dira, ez kristiñauenak, eta orregaitik, gure artean fedebakoak be ba'diran lez, gaurko eritxietan, oba litzake olako eskaria Gotzaiñak egitea, ez Aldundiak. Baiña aldian aldikoa, orduan agintariak egin eben Erroma'ra eskaria eta Aita Santuak erantzun be bai. Milla bederatzureun eta irugarren urtean, urrillaren amaikagarren egunean artu zan erantzun ori. Aurten dira ba, larogei ta amar urte.


Pozik artu eben Bizkai'tarrak erantzun ori eta poza klean agertu nai izan eben. Or daukagu beste arazo bat: Noraiñokoa da barruko fedea klean agertzeko eskubidea? Eta eskubidea izan arren, olako gauzak egitea gauza egokia da? Baiña sasoi aretako giroa ori zan: Guztiok fededun eta guztiak kaleratzeko gertu egon bear.

Amaren jaia ospatzeko ba, eleizbide eder bat gertatu zan Bizkai guztirako Bilbao'n. Orduko oiturea zan lez eleiz-bazkun guztien "banderak" eta olakoak eroango ziran, eta errikoak be bai. Dana artzen zan ontzat.

Baiña ba-ziran orduan be olako gauzak begi txarrez begiratzen ebezanak eta Andra Maria'ren jaia bakean egitea geienak nai izan arren, talde bat aurka jarri zan eta izkanbila ikaragarria sortu eben: Burruka orretan gizon bat il be egin eben: Markos Maraion Deustu'ko Ikastetxe Nagusiko baratz-zaiña.

Ara nondik nora Bizkai'tarren poza atsekabe ta, bear ba'da, gorroto biurtu zan! Kondaira'rako gomutaki baltza.

Baten batzuk esango dabe olakoai ez jakela jaramonik egin bear eta oiturai indarra emon bear jakela, atzerantza



egin barik. Beste batzuk ostera uste dogu eleizkizuna eleizan egitea gauza egokiagoa dala, batez be gaurko giro baragarri onetan.

Begoña'ko Andra Maria'ren jaia dagonil edo agustuaren 15'ean ospatzen dabe Bizkaitarrak. Zer orduan urrillaren 11'n?

Urrillaren 11'n ospatzen dana, Begoña'ko Ama Bizkai'ko zaindaritzat aukeratua ta onartua izan zan egunaren urteagarrena da, ez besterik.

Egia da Begoña'ko Amaren izena "Jainkoaren Ama" dala, eta len Andra Maria'ren izen au urrillaren amaikan ospatzen zan. Gero urterillaren lenengo egunera aldatua izan da. Baiña orretan ardura-dun izan diranen ustez, Ama'ren eguna Bilbao'ko jaien inguruan, dagonillaren amabostgarren egunean dogu eta Zaindaritzat artua

izan zanaren urteagarrena urrillaren amaikagarren egunean.

OLAZAR'TAR MARTIN'EK

